

Berjasa nafi krisis politik di Kelantan

Bahan asal dari Arkib
Negara Malaysia

KOTA BAHRU, Jumaat — Dewan Pemuda Berjasa Malaysia, baru-baru ini menafikan berlakunya krisis politik di Kelantan akibat rebutan kerusi antara Berjasa-UMNO dalam persiapannya menghadapi pilihanraya umum akan datang.

Dewan itu juga menolak sebarang perselisihan faham antara kedua parti sehingga kedudukan Menteri Besar, Datuk Haji Mohamad Yacob dikatakan tergugat sekarang.

Setiausaha Dewan itu, Encik Abdul Halim Haji Ahmad memberitahu Berita Harian, Berjasa tetap patuh kepada keputusan pucuk pimpinan parti negeri dan pusat.

Ramalan

“Tidak ada sebarang perebutan kuasa untuk kerusi negeri atau Parlimen antara kedua parti,” ujarnya.

“Berjasa adalah anggota komponen BN. Segala keputusan mengenai hal itu adalah keputusan BN, tidak timbul Berjasa mendesak atau menekan parti lain,” tegasnya.

Di Kelantan sekarang tersebar berita kononnya berlaku krisis politik antara Berjasa-UMNO dan dikatakan kedudukan Datuk Haji Mohamad selaku Menteri Besar tergugat tidak dapat berbuat apa-apa.

Encik Abdul Halim menggesa seluruh ahli Berjasa bertenang dalam suasana sekarang

serta memberi kepercayaan kepada pimpinan BN untuk menentukan kedudukan politik Kelantan menjelang pilihanraya umum akan datang.

Demam pilihanraya mula tersebar di sejuruh Kelantan berikutan ramalan-ramalan yang menjangka pilihanraya mungkin diadakan April depan.

Beliau yang juga ahli Jawatankuasa Agung Berjasa berkata, Berjasa sentiasa bekerjasama rapat dengan UMNO dalam pentadbiran kerajaan BN di Kelantan.

Setiausaha Politik kepada Presiden Berjasa, Encik Mustapha Ahmad berkata, tidak timbul soal rebutan kerusi negeri atau Parlimen antara Berjasa-UMNO di seluruh negara.

Menyebarkan

“Berjasa adalah sebuah anggota komponen BN, tetap mematuhi segala keputusan yang akan dibuat oleh Pengerusi BN, Datuk Seri Dr. Mahathir Mohamad.

“Keputusan pencalonan mesti dirujuk kepada pucuk pimpinan BN yang di pengurusikan oleh Datuk Seri Dr. Mahathir”, ujarnya.

Encik Mustapha berkata, golongan menyebarkan dakwah itu adalah mereka yang tidak senang hati melihat kerjasama erat kedua parti itu.

Beliau menggesa seluruh ahli Berjasa dan UMNO di Kelantan bertenang dan jangan terpengaruh dengan khabar itu yang mungkin akan memberi kesan buruk kepada politik di kampung-kampung.